

戒爭訟文

世間損財破家結讐成怨莫甚於爭訟有司民牧卽未必清飲廉泉平同盂水其於訟也必利於息而不利於爭也乃吏胥差役未必公門修善手不名錢利於爭而不利於息訟師干証未必心因義激鳴出不平利於爭而不利於息故一紙入公庭爲官者耳目最長訪聞最確某也家產約有若干欲求必勝必須若干送我方可不然理本長也我幻之以短詞本直也我幻之以曲吹毛求疵事權在手孰敢違乎爲吏役者生發無窮求索無厭某也使費止得若干欲得訟勝必須若干再用方可不然事可審也我偏不教官審案可結也我偏不教官結舞文弄弊

道藏輯要

呂帝文集

卷

室集五  
八上川

狂猾隨心孰能逃乎爲訟師者其初兩造原屬小憤輒恐之曰彼怒不解矣宜先發制人原屬小事輒峻之曰彼小題大做矣宜大題應之原肯和處輒阻之曰居間愚我也彼布置已定原易審結輒疑之曰錢神力少也莫輕易就審甚而受一家之財佯爲勸止而實以鼓進得兩家之賂明爲竭忠而暗以輸敵一告可止而動經數告一倍可了而花費十倍嗚呼上產不過萬金中產不過千金下產不過百金一經爭訟官長吏胥差役訟師莫不沾沾惟利是圖惟財是索勢不由己不容不費爭得訟勝而財已失家已破一毫無所得訟果有益耶無益耶何況兩相爭者兩相恨其恨終身不忘也不止終身不忘也兩姓子孫

亦必懷恨曰我祖父爲彼祖父爭訟爲彼祖父失財爲彼祖父破家故我子孫無財無家貧苦無聊非爭訟害之而何不恨官長吏胥差役訟師得財得利之人而恨彼祖父對爭對訟之人爭得訟勝而讐已結怨已成數世不能解訟果有益耶無益耶愚哉世人而好爭訟者何不一省也至於爭財而訟交道澆漓爭產而訟骨肉殘傷爭妻爭妾而訟婚姻醜播不勝所失倍於所爭勝之所得不償所失是故訟之必不可爭爭之必不可訟也蓋如此世之人何不慎旃痛戒之